

## Morning Regional Dogri News Bulletin, 10 April 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

लोकसभा चुनाएं लेई चुनांs प्रचार तेज, बीजेपी दे स्टार प्रचारक ते उत्तर प्रदेश दे मुख्मंत्री योगी आदित्यनाथ होर अज्ज कठुआ च चुनावी रैली गी संबोधित करडन।

राश्ट्रपति द्रौपदी मुर्मू होर अज्ज नर्मिं दिल्ली च विश्व होम्योपैथी ध्याड़े दे मौंके पर 2 दिनें दे होम्योपैथिक सिम्पोजियम दा उद्घाटन कीता।

ईद-उल-फितर दा त्यौहार अज्ज समूलचे जम्मू-कश्मीर च बड़े उत्साह कन्नै मनाया जा'रदा ऐ।

ते आई.पी.एल च जंदी रातीं सनराइजर्स हैदराबाद नै पंजाब किंग्स गी द'ऊं रन्ज कन्नै हराई दिता, अज्ज जयपुर च राजस्थान रायल्स दा मुकाबला गुजरात टाइटन्स कन्नै होग।

<><><><><><>

### Udhampur-Campaign

उधमपुर लोकसभा सीट लेई प्रचार अभियान जोरें-शोरें कन्नै जारी ऐ। भारती जनता पार्टी दे वरिष्ठ नेता ते कांग्रेस दे वरिष्ठ नेता अपने-अपने मेदवार दे हक्क च रैलियां करा रदे न। इस संसदीय हल्के लेई 19 अप्रैल गी वोट पाए जाने न। भारती जनता पार्टी दे स्टार प्रचारकें दा रैलियां करने दा कार्यक्रम ऐ। उत्तर प्रदेश दे मुख्मंत्री योगी आदित्यनाथ होर अज्ज कठुआ च रैली गी संबोधित करडन। इस बारें होर जानकारी कठुआ आले संवाददाता थवां प्रधानमंत्री नरेंद्र मोदी होर 12 अप्रैल गी उधमपुर च रैली करडन।

एह रैलियां उधमपुर लोकसभा सीट लेई बीजेपी दे मेदवा डॉ. जितेंद्र सिंह हुंदे समर्थन च कीतियां जा रदियां न। राहुल गांधी होर इस हफते दे अखीरै च पार्टी दे चुनांस प्रचार अभियान च शामिल होडन। कांग्रेस नेता प्रियंका गांधी ते राज बब्बर हुंदा बी पार्टी दे मेदवार चौधरी लाल सिंह हुंदे समर्थन च चुनावी रैली गी संबोधित करने दा कार्यक्रम ऐ।

<><><><><><>

### ECI-Suvidha

चुनांस आयोग नै चुनांस प्रक्रिया गी सुचारू ते पारदर्शी बनाने दे मकसद कन्नै सुविधा पोर्टल दी शुरूआत कीती ऐ। इस पोर्टल राएं मेदवार ते सियासी पार्टियां चुनांस अभियान लेई लोड़चदी इजाजत लेई सकदे न। एहदे राएं मेदवारें ते सियासी पार्टियां इक्कै थाहरा थवां अपनी समस्याएं दा हल करी सकदियां न। बक्ख-बक्ख चाल्ली दी इजाजत लेई सकदियां न। एहदे राएं चुनांस प्रक्रिया च पारदर्शिता आंग ते आजाद चुनांस करोआना यकीनी बनी सकोग। मुख् चुनांस अधिकारी पी.के पोले होरें सियासी पार्टिएं ते मेदवारें गी अपील कीती ऐ जे ओह 2024 आले आम चुनावें लेई इनें सेवाएं दा इस्तेमाल करन। मेदवार ते सियासी पार्टियां पोर्टल <https://suvidha.eci.gov.in> थवां होर मती जानकारी लेई सकदियां न।

<><><><><><>

### J&K Police Election

जम्मू लोकसभा हल्के लेई आँदे चुनांस दी तयारिएं दा जायजा लेने लेई पोलीस निगरान-बी गजराय होरें रियासी जिले दा दौरा लाया।

आकाशवाणी जम्मू दे संवाददाता दी रिपोर्ट मुजब पुलस निगरान होरें जिला चुनांस अफसरें, एस.एस.पी ते होरनें दुए पुलस अधिकारिएं कन्ने बैठक लाई ते उनेंगी सौहगा, सतर्क राँहने लेई आखेआ तां जे चुनाएं गी आजाद निर्पक्ख ते सुचारू ढंग्गै सिर करोआना यकीनी बनी सके।

<><><><><><>

### DEO-Samba

सांबा दे जिला चुनांस अधिकारी होरें कल जिला नोडल अफसरें कन्ने बैठक लाई ते औंदे लोकसभा चुनाएं दी त्यारिएं दा जायजा लैता। बैठक दौरान जिला चुनांस अधिकारी होरें नोडल अफसरें गी उंदी झ्यूटी बारे दस्सेया ते अफसरें गी हिदायत कीती जे ओह पूरी तनदेई कन्ने अपनी झ्यूटी गी अंजाम देन। उनें अफसरें गी जोर देइए आखेआ जे ओह चुनाएं गी आजाद, निर्पक्ख ते शांतिपूर्ण ढंग्गै सिर करोआना यकीनी बनाने लेई लोइचदे सारे कम्मै गी करन।

<><><><><><>

### NTA-Clarification

राश्ट्रीय परीक्षा एजेंसी एन.टी.ए नै साफ कीता ऐ जे उनें ऐसा कोई निर्देश जारी नेई कीता ऐ कि जेहड़े विद्यार्थी आम चुनाएं च वोट पांदे न ते अपनी ऑंगलिये पर सेयाही लोआंदे न, उनेंगी मतेयान हाल च दाखल होने सवां रोकेया नेई जाग। एजेंसी नै आखेआ ऐ जे इक सोशल मीडिया पर इस सरबंथै च चलै करदा प्रचार मैसेज पूरी चाल्ली बेबुनियाद ऐ ते उन्नै ऐसा कोई निर्देश जारी नेई कीते दा ऐ। एजेंसी नै विद्यार्थिये गी आखेआ ऐ जे ओह इस चाल्ली दिये अफवाई पर ध्यान नेई देन ते अपनी पढ़ाई पर ध्यान देन।

<><><><><><>

## Prez. Homeopatihc Symposium

राष्ट्रपति द्रोपदी मुर्मू होर अज्ज नर्मी दिल्ली दे द्वारका च यशोभूमि सम्मेलन केंद्र च विश्व होम्योपैथी ध्याड़े दे मौके पर 2 ध्याड़े दी होम्योपैथी संगोष्ठी दा उद्घाटन करडन। संगोष्ठी दा आयोजन आयुष मंत्रालय तहत केंद्री होम्योपैथी अनुसंधान परिषद करा रदी ऐ। एहदा विषय ऐ अनुसंधान ते कार्यदक्षता च इजाफा। इस आयोजन दा मकसद पूरे पराते सेहत ते आरोग्य, होम्योपैथी शोध च मती नर्मी तकनीक दे इस्तेमाल गी बढ़ावा देना ऐ। इस वैज्ञानिक संगोष्ठी च महामारी, जन सेहत, होम्योपैथी दवाइयें दे मानक जनेय विषय पर सत्र होडन।

<><><><><><>

## J&K Eid

समूलचे जम्मू-कश्मीर च अज्ज ई-उल-फितर दा त्यौहार मनाया जा रदा ऐ। जंदी रातीं चन्नै दे नजर औने मगरा अज्ज ईद मनाई जा रदी ऐ। इस बारे ग्रेंड मुफती नासिर-उल इस्लाम होरें घोषणा कीती ही। ग्रेंड मुफती होरें सब्बनें गी ईद दी मबारखां दिंदे होई प्रार्थना कीती जे ईद दा त्यौहार सब्बनें लेई खुशहाली, अमन-शांति ते तरक्की बाददा लेइयै आवै। सीरत कमेटियें ईद दी नमाज अदा करने दे समें बारै जानकारी दिती ऐ। एहदे थमां पैहले कल लोकें गी ईद लेई खरीददारी करदे दिक्खेआ गोआ। ईद दे मौके पर उपराज्यपाल मनोज सिन्हा होरें लोकें गी ईद दी मबारक दिती ते अमन-शांति ते खुशहाली दी कामना कीती।

<><><><><><>

## Chinar Corps

चिनार कोर प्रमुख लेफ्टिनेंट जनरल राजीव घई होरें कल कुपवाड़ा जिले च नियंत्रण रेखा कश घुसपैठ रोधी तंत्र ते सेना बल दी कार्रवाई सरबंधी तैयारियें दी समीक्षा कीती।

सेना दी चिनार कोर नै सोशल मीडिया पोस्ट च जानकारी दिती जे कमांडर घई होरें फौजियें कन्नै गल्लबात कीती ते हर मौसम च इलाके च हर चाल्ली लेई तैयार रौहने ते मनोबल गी बनाई रखने लेई प्रेरित कीता।

<><><><><><>

### Exam

जम्मू-कश्मीर दी हार्ड जोन च 8मीं जमात दा मतेयान जेड़ा अज्ज होना हा गी अग्गे पाई दिता गेआ ते एह 16 अप्रैल गी होग। जारी इक अधिसूचना मुजब 8मीं जमात दे हिंदी ते उर्दु भाषा दे पेपर गी अगड़ा पाई दिता गेआ ऐ। एह मतेयान अगले हफते मंगलवारें लैता जाग।

<><><><><><>

### Haryana-Governor

हरियाणा दे गवर्नर बनदारू दत्तरैया होरें कल श्रीनगर च शिव मंदिर जाइये मत्था टेकेआ ते कश्मीरी पंडित समुदाय कन्नै रलियै नवरेह कश्मीरी नमें साल गी मनाया। नवरेह दा जश्न विचार नाग मंदरै च कोई 35एं बरें मगरा मनाया गेआ। कश्मीरी पंडित समुदाय दे लोकें गी संबोधित करदे होई दत्तरैया होरें एह यकीन दोआया जे कश्मीर च मंदरें दा परतियै निर्माण करियै उंदी शान गी बहाल कीता जाग।

गवर्नर होरें इस मौके पर जम्मू-कश्मीर पुलस दी खिते च आतंकवाद खलाफ लड़ाई बारे अमित रैना हुंदे आस्सेआ लिखी गेदी इक पुस्तक दा विमोचन कीता ते सप्तऋषि सेतम दे 5100 बरें गी मनाने लेई इक विशेष कैलेंडर बी जारी कीता।

<><><><><><>

### J&K Earthquake

किश्तवाड़ जिले च कल 3 अशारिया 7 तीव्रता आले भूचाल दे झटके महसूस कीते गए। आकाशवाणी जम्मू संवाददाता दी रिपोर्ट मुजब एह भूचाल 4 बज्जिय 44 मँटें पर आया। रिक्टर पैमाने पर एहदी तीव्रता 3 अशारिया 7 मापी गई। किश्तवाड़ जिले च 7 अप्रैल गी बी3 अशारिया 5 तीव्रता आले भूचाल दे झटके महसूस कीते गे हे।

<><><><><><>

### Shaivism

नरातें दे जश्न दे हिस्से दे तौरा पर ओम चंद्र ब्रह्मपुत्र संस्था नै वृद्ध आश्रम पंजग्राईं जगटी च कश्मीरी शैवमत उप्पर इक संगोष्ठी दा आयोजन करा रदा ऐ। इस आयोजन च माहिर हिस्सा लैडन ते शैवमत उप्पर लेक्चर बी देडन।

<><><><><><>

## IPL

ते हुन आई.पी.एल क्रिकेट।

अज्ज जयपुर दे सवाई मानसिंह स्टेडियम च राजस्थान रायल्स दा मकाबला गुजरात टाइटनस कन्नै होग। मैच संझा साङ्डे 7 बजे शुरू होग। एहदे शा पैहले कल राती चंडीगढ़ दे महाराजा यादवेंद्र सिंह इंटरनेशनल क्रिकेट स्टेडियम च सनराइजर्स हैदराबाद नै इक दिलचस्प मकाबले च पंजाब किंग्स गी 2 रन्ज कन्नै हराई दिता हा।

<><><><><><>